

■ CONVIVENZA

Dir las chaussas sco quai ch'ellas èn

DA PIEDER CAMINADA*

As regardais Vos anc da l'urs M13 che ha stuì laschar la vita il favrer 2013? Gea exact, quai è stà quel urs che ha gì pauc respect dals umans e che aveva pli gugent las nursas che quai ch'igl era d'engrà als purs ed a la lescha. In-sacura èsi simplamain stà da memia cun il consum da charn-tschut exagerà – e lura è M13 vegnì vid-londer. Quai che ha legrà ils inimis dals urs e mess en agitaziun ils amis dals urs, è stà per las autoritads grischunas in act quasi bi-rocratic. E gist uschia hai era tunà: la «retratga da l'urs or da la natira» saja stada inevitabla, hai gì num en plets tant patetics sco dissimulants.

Gea, tschertas chaussas vegnan «retratgas or da la natira», autras la vegnan returnadas. Per exempel sin la Via Sommerau a Cuira. Sin via tranter la chasa da medias Somedia e la staziun da Cuira Vest stoss jau en scadin cas adina far atenziun da betg passar en tschertas chaussas. Ellas èn radundas – in pau pli grondas ch'in pulit ov da giagliana – e vegnan adina avant en mantuns. Da tge che jau discurs? Sa chapescha da mitgas-chaval che vegnan adina danovamain depoidas sin il tschancun da via menziunà u apunta returnadas a la natira. N'è la citad da Cuira tgisà betg uschè severa cun allontanar las mitgas-chaval, perquai ch'il territori che cunfinescha cun la Via Sommerau sa numna Rossboden? Damai libramain tenor il princip: nomen est omen?



Saja sco ch'i veglia. La Via Sommerau n'è betg la suletta via, nua che la consegna a la natira succeda regularmain e surtut al fauss lieu. En noss vitg èsi exact tuttina, cura ch'ils purs van per lur muvel sin pastgira. Quels dis na fimi betg darar sin las vias communalas asfaltadas. E pauper quel che ballantscha tard la notg suenter in pèr sitgs da l'ustaria encunter chasa e na fa betg stim, nua ch'el tschenta ses pes ...

En sasez fissi gea simpel. Mias «observaziuns al lieu» intensivadas davent da la fanestra-cuschina han numnadamain cumprovà ch'ils buns arments returnan intensivamain chaussas a la natira sulettamain lura, sch'els vegnan pli che plains da la pastgira – ed era mo suenter ch'els han bavì liters e liters aua a la funtauna dal vitg. Sin viadi da la stalla sin pastgira percunter na capita tenor mias observaziuns quasi nagut, perquai che las vatgas èn lura evidentamain uschè fomentadas ch'ellas vulan ir ina lingia sin pastgira e betg anc sa refrestgentar avant al bigl.

Etge pudain nus em-prender da questa istorgia? Ins pudess diriger levamain la furniziun d'increments da vatgas a la na-

tira cun posiziunar endretg las funtaunas, uschia ch'il material da consegna vegniss plazzà en il lieu giavischà: sin ils prads, als quals la grascha natirala fa uschè bain. Mo fin ussa naging che ha gì l'idea da crear in tal sistem raffinà da plazzar bigls. Forsa duess jau laschar patentar l'idea. U che la confederaziun stuess subvenziunar quest program ch'augmentass l'effizienz.

Saja sco ch'i saja: jau sun da l'avis ch'ins duess dir las chaussas sco quai ch'ellas èn – era sche quai po magari tunar in pau maltschec. Igl è però in fatg che l'urs M13 che las autoritads grischunas han «retratg or da la natira» è simplamain vegnì schluppettà. E quai ch'els chavals e las vatgas laschan crudar sin las vias n'ha da far nagut cun «ina consegna a la natira»: i n'è nagut auter che merda.

*Pieder Caminada è vice-schefredactor da la «Südostschweiz». El è creschi si a Glion en in ambient per gronda part tudestg e viva oz en la vischnanca rumantscha da Castrisch.

Vocabulari

urs – Bär
nursa – Schaf
esser d'engrà – recht sein
charn-tschut – Lammfleisch
retratga – hier: Entnahme
dissimulant – verschleiern
Cuira Vest – Chur West
en mantuns – gehäuft
mitgas-chaval – Pferdeäpfel
allontanar – entfernen
consegna – hier: Abgabe
muvel – Vieh
pastgira – Weide
obervaziuns al lieu – hier: Feldbeobachtungen
arment – Riendviech
fomentà – hungrig
ir ina lingia – hier: schnurstracks gehen
schluppettà – abgeknallt
merda – hier: Scheisse



Lia Rumantscha